

# PABOJA ETEHUE'YO TESANONICA CUIÑAJJIJO BA'E YASIJJE EBIONEI 1 TESALONICENSES

Pabohua esohui tehue canaje Jesosaja epeeji  
cuana Tesanonica cuiñajjiyo ba'e yasijje

**1** <sup>1</sup>Eya Pabo. Sinasi, Timoteo pea'ai enijje nequi. Jiquio esohui ecuaaya tehueña miquiana huasijje, ma Jesosaja epeeji nei cuana Tesanonica cuiñajjiyo ba'e yasijje. Miquianaya Eyacuiñajji esēja Chii ai nijje jjapeequiani, Jesosa Quito esējaya Emeshi Mese nei nijje jjapeequiani pea'ai. ¡Eyacuiñajjiya, Jesosa Quitohua pea'ai miquianaya quea pame nee cajaanahua cahua! ¡Quea bei capo mee cahua pea'ai!

Jesosaja epeeji cuana quea pame nee ba'yani

<sup>2</sup>Eyacuiñajji nijje mimianijo ecuaaya oya bihuiaña miquianajo. E'e, ecuaana Eyacuiñajji nijje mimi huicha'a huicha'ani miquianajo jama ba'a: <sup>3</sup>—Eyacuiñajji, ecuanaja Chii ai, Jesosaja epeeji Tesanonicaajo ba'eca minijje jjapeequiani cuana quea pame nee nee. Miya ojaya quea boti nee nee; minijje quea pame nee chaco cani tii. Oya cuana Jesosa Quito nijje, ecuanaja Emeshi Mese nei nijje jjapee tiitiiquiani quea pame nee. E'e, jjashahuabaquiani jama ba'a: “Jesosaa ecuaana ba'e tiitii mee caje'yo onijje eyajo” —jamaya ecuaana mimiani Eyacuiñajji nijje miquianajo.

<sup>4</sup>Epeeji cuana, miquianaya Eyacuiñajji quea jea nee nee. Ohuaya miquianaya babaca majje iyaa canaje ojaya epeeji epo tiitii'yojji. Jamaya ecuanajaya eba. <sup>5</sup>E'e, ecuaaya Eyacuiñajji esohui quea pame nee Jesosaja huohuinaje miquianajaya eshajja'ajjajji. Edojjoshahua Pameya ecuanaya sohuihuohui meesahua canaje quea ja'a nee nee; miquianaya ba mee canaje Eyacuiñajji esohui e'e nei, dejjaja esohui pojjeama. Ecuaana quea pame nee ba'enaje miquiana nijje. Jamajjeya

ecuanaya miqúiaaya banaje quea pame nee ba'e. Jamajjeya miqúianaya ba'enaje quea pame nee ecuana jayojjaya. <sup>6</sup>E'e, miqúianaya ecuana jayojjaya ba'enaje quea pame nee nee; esejaya Emeshi Mese nei jayojja jama pea'ai ba'enaje. Jamajjeya pea cuaa miqúianaya cuia canaje Jesosa nijje japee neineiquianijojo. Jamatii miqúianaaya quea bihui neeya Jesosaja esohui shajja'ajjanaje; Edojioshahua Pameya miqúianaya quea bihui nee po mee canaje. <sup>7</sup>E'e, miqúianaya quea ja'a nee japeequinaje Jesosa nijje. Jamajjeya ojjaña Jesosaja epejji cuana Masenonia meshijo ba'eca cuana, Acaya meshijo ba'eca pea'ai miqúiana ba majje quea ja'a nee japeequi sa poani Jesosa nijje miqúiana jayojjaya. <sup>8</sup>Miqúianajaya esohui Emeshi Mese nejjo, Jesosajo ojjaña Jesosaja epejji cuaa shajja'ajja canaje. E'e, Masenonia meshijo ba'eca cuaa, Acaya meshijo ba'eca cuaa pea'ai shajja'ajja canaje. Ojjaña ba canaje miqúianaya Jesosaja epejji quea ja'a nee poani. Ojjaña cuaa quea huiso meshijo ba'eya pea'ai ba canaje miqúianaya Eyacuíñajjija esohui jayojja jama po tiitiani quea pame nee. E'e, ojjaña cuaa ojjaña meshi cuanajo ba'eya miqúianajo shajja'ajja canaje. Jamajjeya ecuaaya oya cuana huohui o'oya jjima aña. <sup>9</sup>Onaaya ca ca ecuana huohui cani miqúianajo jama ba'a: —Jesosaja epejji cuana Tesanonica ba'e Paboja esohui Jesosajo ebionei shajja'ajja jeahua jjashajja'ajjaquinaje quea bihui nee. Jesosaja epejji cuana poanaje. Eyacuíñajji nisho, meshi epana'yo cuana bihuia pajea ca'yonaje. Jjeya nei ca ca oya cuana Eyacuíñajji e'e nei nijje japeequiani. E'e, Eyacuíñajji ca ca oe nei yani tii tii, eshe. <sup>10</sup>Ohuaya Eyacuíñajjija Bacua Ejja oe nei Jesosaja epoe o'oyajji ishoa'ajja cani —jamaya ojjaña miqúianajo poani.

E'e, Eyacuíñajjija Bacua Ejja Jesosa mano'yajo, Eyacuíñajjiya oya ba'e mee ca o'oyanaje. Jjeya ohuaya, Jesosaa esejaya mimishi cuana cuijea ca poquipoqui'yani. Jamajjeya quijje Eyacuíñajjiya eseya sosequia caje'yo jiquio meshijo ba'ya poa sosejjeya; ohuaya eseya quea nee nee epo mee'yojji pojjeama shajjama' cuana nijje.

### **Pabo chachacoa poa Tesanonica meshijo**

**2** <sup>1</sup>Yahuajo ecuaaya Jesosaja esohui huohuinaje; miqúianaya shajjama' pojjeama poa. Chojja, shajja'ajja neinei nequiaa poa. Miqúianajaya jama eba pea'ai ba'a: <sup>2</sup>Miqúiana baa Tesanonica huasijje poqui jjimahua ecuana cuia canaje Jodio cuaa Pinipo cuiñajjijo ba'eca cuaa. Ecuana nijje mimijajinaje pea'ai. Pea cuaa ecuana cuia canaje Jesosaja esohui huohui mee ajjaa jjejojo; jamatii Eyacuíñajjiya ecuana ojaya esohui quea pame nee Jesosa Quitojo huohui meesahua canaje miqúiana huasijje mete'ama, miqúianajaya eshajja'ajjajji.

<sup>3</sup>E'e, miqúiana huasijje sohuihuohuiañajo ecuanajaya ejjashahuabaquijji quea ja'a nee poanaje. Ecuanaajaya esohui sijje pojjeama. Miqúiana dasia sa po'yo ajja pea'ai. <sup>4</sup>Chojja. Eyacuíñajjija eba ecuanaya sijjepojji pojjeama. Jamajjeya ohuaya ecuana huoojea canaje Jesosaja esohui quea pame nee huohuiya. Eyacuíñajjija ejjashahuabaquijji jayojja jama huohuiaña ecuaaya. Eyacuíñajjija eba nei nei

ecuanajaya ejjashahuabaquijji ojaya ejjashahuabaquijji jayojja jama poani tii. Ecuaya oya quea bihui nee po mee sa aña ecuana nijje. E'e pojja'a pea cuana quea bihui pojjeama ecuanaja huohui'yojo. Jamatii ecuana jjashahuabaquiani jama ba'a: —Ecuaya esohui huohuiaña pea cuanaja ejjashahuabaquijji jayojja jama pojjeama, pea cuana enijje quea bihui epojji pojjeama —chojja, Eyacuiñajji quea bihui nee po mee sa aña ecuana nijje. <sup>5</sup>Miquianajaya ecuana eba. Esohui quea bihui nisho mimi jjima miquiana nijje miquiana dasiajji, aquiana sosema' edojjji pea'ai. Chojja, Eyacuiñajjija eba ecuanajaya ejjashahuabaquijji quea pame nee. <sup>6</sup>Jashahuabaqui ajja jama ba'a: —Ecuana esohui quea pame nee shajja'ajja majje ecuana cabihua cahua cuaa; aquiana caquia cahua pea'ai —chojja, ecuana jjashahuabaqui ajja pea cuanaja ebihuijji.

<sup>7</sup>Ecuana Jesosa Quitoja huoojea'yo ojaya esohui huohuijji. Jamajjeya miquianajaya aquiana sosema' jjesheme esohui huohuinaje sosejje. Jamatii aquiana cuana ecuanajaya jjeshe jjima poanaje. Chojja, miquiana nijje quea bei ba'enaje. Jiquio ecua enaeseya oja bacua cuana jaahuana cani, quea jea nee acani jayojjaya jama ecuaaya miquianaya anaje. <sup>8</sup>Miquianaya ecuanajaya quea boti nee nee poanijo Eyacuiñajjija esohui quea pame nee nee Jesusaja huohuinaje miquiana huasijje. Pea cuaa ecuana cuia ca chana' Jesusaja esohui ehuhui poaje jjejojo. Jamatii miquianaya ecuanajaya quea jea nee nee poanijo esohui huohui tiitiinaje. <sup>9</sup>E'e, miquianajaya eba miquiana nijje nequianijo ecuaaya janobajjima nei chaco tiitiinaje eba'ejji sosejje. Eyacuiñajjija esohui quea pame nee Jesusaja huohuiañajo chaco tiitiinaje epojjajo, mecajje pea'ai. Jamaya anaje ecuaaya. Jamajjeya miquianajaya ecuana eba'ejji quia jjima poanaje. Eyacuiñajjija esohui huohuinaje sosema' miquianajaya eshajja'ajjajji.

<sup>10</sup>Ecuana miquiana nijje ba'enaje quea bei nee, mimishi'ama, quea pame nee, dejja tai'ama. Jamaya miquianajaya eba. Jamaya Eyacuiñajjija eba pea'ai. Jamajjeya ¿yajjajo pea cuaa ecuana niñeba cani so'o quea dejja tai poanaje miame? <sup>11</sup>E'e, echii meseya oja bacua cuana cuiña cani quea pame nee jayojjaya jama ecuaaya miquianaya anaje. Jamaya miquianajaya eba pea'ai.

<sup>12</sup>Ecuaya miquianaya huohui majamajanaje jama ba'a: —¡Quea bihui nee Jesosa Quito nijje jjapeequicue! ¡A'a quea yeno pojji onaa miya quea mimishi acajje! Eyacuiñajji oe nei quea ja'a nee nee, quea ca'a nee nee poani tii tii. Oya oe nei ojjaña huoojea'yoyji poani. Ohuaya miquianaya babaca canaje onijje eba'e tiitii'yoyji eyajo. Jamajjeya ¡ojaya esohui jayojja jama ba'e tiitiicue Eyacuiñajji miquiana nijje quea bihui nee epojji!

<sup>13</sup>Ecuaya Eyacuiñajji bihuliaña miquianajo jama ba'a: —Eyacuiñajji, eyaya miya bihuliaña Jesusaja epeeji cuana Tesanonicajo ba'e quea pame nee poani yasijje. E'e, miyaya miquea esohui huohui meesahuañajo, onaaya shajja'ajja canaje. Quea bihui nee poanaje. Quea ja'a jjashahuabaquinaje jama ba'a: “E'e jojo nei Pabohua ojaya esohui pojjeama huohui cani; Eyacuiñajjija esohui quea pame ca ca huohui cani” poanaje cuana —jamaya ecuaaya Eyacuiñajji bihulia huicha'a huicha'aña miquianajo.

E'e epeeji cuana, Jesosa nijje jjapeequianijo, Eyacuiñajjiya miqianaya ba'e meesahua cani quea pame nee ojaya esohui e'e nei jayojjaya.

<sup>14</sup>Yahuajo Jesosaja peeji cuana Jodio meshijo ba'e onijje, Jesosa Quito nijje jjapeequianijo, pea Jodio cuaa, oja huapa pojjeama cuaa oya cuana cuia ca poa quea huiso nee. Oya jayojjaya jjeya miqianaya Jesosa nijje jjapeequianijo, miqianajaya huapa pojjeama cuaa miqianaya cuia cani pea'ai. <sup>15</sup>E'e, yahuajo nei nei Jodio cuaa Eyacuiñajjiya esohui huohuiji cuana cuiajea ca'ya poa. Majoya esejaya Emeshi Mese nei Jesosa quecua mee ca'ya poa pea'ai. Jjeya eseya cuia cani pea'ai, Jodio cuaa. Shajjamaa po tiitiya jjejojo Jodio cuaa Eyacuiñajji quea quene po tiiti mee capoquiani. Jodio cuaa aje oe ojjaña dejja cuana quea tai acani. <sup>16</sup>E'e, ecuaaya Jodio pojjeama cuana huasijje Eyacuiñajjiya esohui quea pame nee Jesosajo huohuiaña. Jodio pojjeama cuana Jesosa nijje jjapeequi mee sa ña onijje eyajo eba'e tiiti mee'yojji quea pame nee. Jamatii Jodio cuaa aje oe ecuana Jesosaja esohui huohui pajea mee'yo sa acani tii. Jamaya oya cuana, Jodio cuana quea mimishi nee nee po tiitiiani. Jamajojya aje jja oe Eyacuiñajji quea quene nee poani Jodio cuana nijje. Quea yeno nee nee po tiiti mee cani Jodio cuana.

#### **Pabo poqui o'oya sa poanaje Tesanonica huasijje**

<sup>17</sup>Epeeji cuana, yahuajo ecuana miqiana nijje nequijo, Jodio cuana ecuana nijje quea quene nee nee poanaje. Jamajjeya miqiana nijje nequi tiiti jjima poanaje. Jamatii miqianaya ecuanajaya pajea'yo jjima. Chojja, miqianajo jjashahuabaquiani tii. Poqui o'oya sa neinei poanaje miqiana baa. Mi poqui mee ca o'oyajje ecuana quea yeno nee poanaje. <sup>18</sup>E'e jojo nei ecuana poqui o'oya sa poanaje miqiana huasijje. E'e eya, Pabo poqui huicha'a huicha'a'ajjanaje. Jamatii Edosiquiana neiya eya poqui mee jjima acanaje. <sup>19</sup>E'e jojo nei miqianaya Jesosaja epeeji poanijo, ecuana quea bihui nee nee poani. Jamajjeya esejaya Emeshi Mese nei Jesosa Quito poe o'oyajo, miqiana onijje nequi'yajo, ecuana quea bihui nee poaje'yo. E'e, jiquio ecua se chacochoajo sosequia cajje eseya quea bihui nee poani jayojja jama ecuana quea bihui nee nee poaje miqiana Jesosa nijje nequi ba majje. <sup>20</sup>E'e, miqianaya quea pame nee Jesosa nijje jjapeequianijo, ecuaaya Eyacuiñajji bihuiaña. Quea jaji nee poani pea'ai miqianajo.

#### **Pabohua Timoteo huoojea canaje Tesanonica ba'eca cuana ba'ajja'yohua**

**3** <sup>1</sup>Jamajjeya miqianajo quea yeno jjashahuaba tiitiiqui majje eya jama poanaje ba'a: —E'e, eya ee nei Atena cuiñajjiyo nequije. Timoteo, ¡miya poquicue Jesosaja epeeji cuana Tesanonica ba'e baa! —eya poanaje.

<sup>2</sup>Majoya eyaya esejaya epeeji nei Timoteo huoojeanaje miqiana baa. Timoteohua ecuana nijjeya Eyacuiñajjiya esohui quea pame nee Jesosaja huohui tiiti cani. Eyaya oya huohuinaje jama ba'a: —Timoteo, ¡Jesosaja epeeji cuana quea ja'a nee, quea pame nee jjapeequi meesahuacue Jesosa nijje! ¡Oya cuana Jesosaja esohui jayojja jama atiiti meesahuacue quea bihui nee! <sup>3</sup>Jamajjeya onaaya oya cuana cuia canijo, Jesosa nijje

jjapeepajeaqui'yo ajja —jamaya eyaya Timoteo huohuinaje miquiana que huoojea jjimahuaa.

Jamatii miquianajaya eba pea cuaa Jesosaja epeeji cuana cuia caje'yo. Eyacuiñajjija eba eseya ojaya epeeji cuana quea ja'a poaje onaa cuia caje. Jamajjeya cuia pajea mee jjima acani. <sup>4</sup>E'e, yahuajo miquiana nijje nequiya ecuaaya huohuinaje jama ba'a: —Jesosaja epeeji poanijo pea cuaa eseya cuia caje.

E'e jojo nei. Jjeya pea cuaa miquianaya cuia cani. Jamaya miquianajaya eba. <sup>5</sup>Jamajjeya eya quea mete miquianajo poanaje. Timoteo huoojeanaje miquiana baa: —¡A'a Jesosa nijje jjapeequiani tii ba'ajjaqui'yo socue, Timoteo! —eya poanaje.

E'e, eya quea mete miquianajo poanaje. E'e pojja'a Edosiquiana neiya miquianaya Jesosa nijje jjapeequi pajea mee ca'yonaje. Jamaya epo'yo jojjemo, miquianajaya Eyacuiñajjija esohui epajea'yo jojjemo ecuaana quea yeno pome; esohui huohuijajji pojja'a eyaya sohuihuohuijea nequinaje.

<sup>6</sup>E'e de, miquiana ba majje jjeya nei Timoteo poe o'oyanaje e que. Ohuaya huohui caña'yonaje jama ba'a: —Jesosaja epeeji cuana Tesanonicajo ba'e Jesosa nijje jjapeequiani tii; pajea'yo jjima. Eyacuiñajjija esohui jayojja jama po tiitiiani; pea cuana quea jea nee acani. Eya pea'ai ohuaya quea jea nee acajjequinaje. Oya cuana ecuanajo jjashahuaba tiitiiquiani quea pame nee. Jiquio ecua ecuanaya jjashahuabaquinaje o baquijji jamaya oya cuana jjashahuabaquiani ecuaana bahuajji —jamaya eya Timoteohua huohui caña'yonaje miquianajo.

<sup>7</sup>Jamajjeya ma shajja'ajja majje ecuaana quea bihui nee poanaje. E'e de, ecuaana aema' poani Jesosa nijje jjapeequianijo. Pea cuaa ecuaana cuia cani pea'ai. Jamatii miquianaya ecuaana quea bihui nee po meeña. E'e, miquianaya Jesosa Quitoja esohui jayojja jama poanijo tii miquianaaya ecuaana quea bihui nee nee po meeña. <sup>8</sup>E'e de, miquianaaya esejaya Emeshi Mese neija esohui jayojja jama atiitiñaajo, ecuaana quea bihui nee, quea bei nee pea'ai poani. <sup>9</sup>E'e jojo nei jjeya miquianajo ecuaaya Eyacuiñajji bihuia neineiaña. Eyacuiñajjiya ecuaana quea bihui nee po mee cani miquianaya quea pame nee onijje jjapeequianijo.

<sup>10</sup>Jamajjeya ecuaana onijje mimi tiitiiani jama ba'a: —Eyacuiñajji, ¡ecuaana poqui meesahua o'oyacue ecuanaja epeeji cuana baa! ¡Ojjaña miquea esohui huohui meesahua o'oyacue onajaya eshajja'ajjajji, quea pame nee minijje ejjapeequi'yojji! —jamaya ecuaana Eyacuiñajji nijje mimiani ojjaña pojjaajo, ojjaña mecajje pea'ai.

<sup>11</sup>Ecuaana onijje mimi neineiiani jama pea'ai ba'a: —Eyacuiñajji, ecuanaja Chii ai, Emeshi Mese nei Jesosa pea'ai, ¡che ecuaana poqui meesahuacue Tesanonica huasijje miquea epeeji cuana baa! <sup>12</sup>E'e Emeshi Mese nei, ¡miqua epeeji cuaa Tesanonicajo ba'e cuaa pea miquea epeeji cuana quea jea nee nee ameesahuacue! ¡Ojjaña cuana pea'ai quea jea nee ameesahuacue! ¡Ecuaa oya cuana quea jea nee nee añña jayojjaya jama oya cuana pea cuana quea jea nee ameesahuacue pea'ai!

<sup>13</sup>E'e Eyacuiñajji, ecuanaja Chii ai, ¡oya cuana Jesusaja epeeji cuana quea ja'a nee po meesahuacue quea boejea, mimishi'ama eba'e'yojji! Jamajjeya ecuanaja Emeshi Mese nei Jesusaa ojjaña ojaya esohuidojojji cuana nijje poe o'oya majje oya cuana mi cojja nei nequi mee caj'e'yo quea boejea, bicho'ama. E'e, ¡jamaya acue Eyacuiñajji! —jamajjeya eya Eyacuiñajji nijje mimi tiitiiani miquiana huasijje.

**¡Quea pame nee ba'ecue Eyacuiñajji minijje quea bihui epojji!**

**4** <sup>1</sup>Jamajjeya epeeji cuana, eyaya pea esohui tehueje miquianajaya ebajji. Yahuajo ecuaaya miquianaya huohuinaje quea pame nee eba'e'jji. Ma ecuanajaya esohui jayojja jama ba'yanijo, Eyacuiñajji quea bihui nee poani miquiana nijje. Jamaya miquianaya ba'enaje. Jjeya esejaya Emeshi Mese neiya, Jesosa Quitohua ecuaana ma esohui tehue mee ca o'oyani miquiana huasijje quea pame tii eba'e poquijji. <sup>2</sup>Yahuajo esejaya Emeshi Mese neiya, Jesusaa ecuaana huoojea canaje miquiana sohuihuohuiya. Ma esohui miquianajaya eba. <sup>3</sup>Eyacuiñajji ejjashahuabaquijji miquianajaya eba'e'yojji jama ba'a: —¡Quea pame nee ba'ecue, mimishi'ama nei nei! ¡A'a onajaya ehuanase siijji! ¡A'a peaja yahue siijji! ¡A'a pea cojjojji pojji! <sup>4</sup>Dejja cuana, ¡miquianaya eponajo jjahuanaqui sa poanijo quea ja'a nee jjashahuabaquicue! ¡Eyacuiñajji esohui jayojja jama epona huanacue quea pame nee! <sup>5</sup>¡A'a quea mimishi jjashahuabaquijji Eyacuiñajji epeeji pojjeama cuana jayojja! Oya cuana aje oe pea epona cuana nijje jaani; ojaya ehuanase jaahuana jjima acani. <sup>6</sup>Onajaya ehuanase sii canijo, e'e jojo nei Eyacuiñajji dejja cuana quea nee nee po mee caj'e'yo. Jamajjeya miquianaaya ca ca ja'a onajaya ehuanase siijji! ¡A'a jea bajji pea'ai! —jamaya Eyacuiñajji jjashahuabaquiani ojaya epeeji cuanajo. Jamaya yahuajo ecuaaya miquianaya huohuinaje.

<sup>7</sup>E'e, Eyacuiñajji eseya iyaa majje huohui canaje jama ba'a: —¡Ecua epeeji cuana po majje ecua esohui jayojja jama ba'ecue quea pame nee nee! ¡A'a oe quea mimishi pojji! ¡A'a oe quea mimishi ba'e'jji!

<sup>8</sup>Jiquio esohui cuana Eyacuiñajji esohui, de; dejjaja esohui pojjeama. Jamajjeya ojjaña joya jiquio esohui cuana jayojja jama ba'e sa po'yo ajja Eyacuiñajji nijje jjapeequi sa po'yo ajja; Eyacuiñajji cajaa a'yojji poani. Eyacuiñajjiya ca ca oe ese yasijje ojaya Edojjoshahua Pame huoojea ca'yonaje quea pame nee eba'e meesahua'yojji.

<sup>9</sup>Miquianaaya Jesusaja pea epeeji cuana quea jea nee añajo, eyaya miquiana que esohui etehue o'oyajji pojjeama ca comajo. E'e, Eyacuiñajjiya miquianaya jjabahuejja meequi canaje ojjaña ojaya epeeji cuana quea jea nee e'ajji. <sup>10</sup>E'e jojo nei miquianaaya jamaya aña; Jesusaja epeeji cuana ojjaña Masenonia meshijo ba'e cuana quea jea nee aña. E'e, Eyacuiñajjiya esohui jayojja jama aña miquiaaya. Epeeji cuana, ¡Jesusaja epeeji oe quea jea nee nee atiitiicue! Jamaya ecuaaya miquianaya huohui neineiaña.

<sup>11</sup>Yahuajo ecuaaya miquianaya sohuihuohuinaje jama ba'a: —¡Quea bei ba'e tiitiicue! ¡A'a jjachichaquijji pea cuana miminaanaa ani yasijje!

¡Miquea bobijo, daquijo, eba'ejjijo pea'ai chacocue! ¡Quea ja'a nee jjashahuaba tiitiiquicue! <sup>12</sup>Jamajjeya miqianaya aquianajji poaje; miqianaya bobi yasijje epo'yoyji pojjeama bobijji po'yo majje. Pea huasijje bobijo cua ajja poaje. Jamajjeya miqianaya quea pame ba'yani ba majje Jesusaja epeeji pojjeama cuaa miqianaya shajja'ajja caje Jesusaja esohui miqianaaya huohuiañajo. Jamajjeya miqianaya quea pame ba'eje.

**Emeshi Mese nei Jesosa poe o'oyajo ojaya  
epeeji emano'yo cuana shequiye o'oya**

<sup>13</sup>Epeeji cuana, eyaya jiquio pea esohui tehueña miqiana ba meejji e'e jojo nei Jesusaja epeeji cuanajo, ma yahuajo mano ca'ya poajo. Jamajjeya miqianaya yeno'ama poaje emano'yo cuanajo. Pea cuana ca ca, Jesusaja epeeji pojjeama cuana quea yeno nee nee poani emano'yo cuana shequi'yo jjima poanijo poso. <sup>14</sup>Esejaya eba e'e jojo nei Jesosa mano'yajo Eyacuiñajjiya oya shequi mee ca o'oya poa. Oya jayojjaya Jesusaja epeeji cuana mano'yajo, Eyacuiñajjiya oya cuana shequi mee caje o'oya. Jamajjeya Jesosa poe o'oyajo Eyacuiñajjiya onijje huoojea caje ojaya epeeji ma yahuajo mano'ya poa cuana. Jamaya e'e jojo nei; jamaya jjashahuabaquime eseya poani.

<sup>15</sup>E'e, Emeshi Mese neiya Jesusaa ecuana huohui ca poa jamaya eyaya miqianaya huohuiaña jama ba'a: Poe o'oya majje Emeshi Mese neiya, Jesusaa ojaya epeeji eshe nequi cuana, ojaya epeeji yahuajo emano'yo cuana nijje ojee jjequisohua caje'yo onijje eyahuasijje. <sup>16</sup>E'e, Emeshi Mese nei Jesosa eyajo ani meshi yasijje poe jeahuajo janobajjima nei taaaje; esohuidojojji jaahuanajjiya quea ca'a nee neeya emiajji mia cani jayojja taaame poaje, janobajjima nei nei. Eyacuiñajjiya emiajji mia caje cuaa pea'ai. Majoya Emeshi Mese nei eyajo ani jipashineijje nequioqueje bo biajje nequi. Jamajjeya ojaya epeeji cuanaja, ma yahuajo mano'ya poaja eyami eshe po mee caje o'oya, eyacua. <sup>17</sup>Majoya poe o'oya majje, emano'yo cuanaja eyami eshe o'oya po mee majje Jesosa Quitohua ojaya epeeji eshe nequi cuana bo biajje jjequisohua caje'yo emano'yo cuana nijje, ojee. Bo biajje nequije Jesosa nijje. Majoya ojjaña ojaya epeeji cuana onijje ba'e tiitiiye'yo Emeshi Mese nei nijje, Jesosa nijje. <sup>18</sup>Jamajjeya jiquio esohuijo quea bihui nee nee pocue! ¡Jesusaja pea epeeji cuana quea bihui nee po meesahuacue! ¡Jiquio esohui cuana huohui huicha'a huicha'acue! Jama ba'a: —Jesusaa ojjaña ojaya epeeji cuanaja eyami eyacua po mee majje jjequisohua caje'yo eyahuasijje onijje eba'e tiitii'yoyji, ojaya epeeji yahuajo mano'ya poa cuana nijje pea'ai.

**¡Jesusaja epoe o'oyajjijo jjashahuaba tiitiiquicue!**

**5** <sup>1</sup>Epeeji cuana, ¡shajja'ajjacue mo oe! Jesusaja epoe o'oyajji miqianajaya eba. Jamajjeya eyaya miqiana huasijje etehuejji pojjeama ache pojjajo oya poeje o'oya ebajo ese. <sup>2</sup>Chojja, ¿ache pojjajo

shai poeje o'oya Jesosa? Emeshi Mese neija epoe o'oyajji esejaya ba jjima epojja. Jiquio ecua siipojji quehuajje poecuajiani jayojja jama Jesosa quehua poecuajije o'oya. <sup>3</sup>O poe jjimahuaajo pishana mimishi cuana jama poaje ba'a: "Ojjaña quea bei poani. Ecuana quea pame nee ba'e tiitiije'yo" onaa jama po'ajjaquijo tiya Jesosa Quito poeje o'oya. Mimishi cuana quea nee nee po mee caje'yo. E'e, Jesosa poe o'oyajo chama' ejja'aniquehuaquijji poaje. Jiquio ecua epona cuana bacua nee cuajiani jama poecuajime poaje Jesosa.

<sup>4</sup>Ecua epeeji cuana, miqianaya Jesosa nijje jjapeequiani. Jamajjeya ¡quea ja'a nee jjashahuabaquicue! ¡Jesosaja epoe o'oyajji ishoa'ajja anicue! Jamajjeya ¡jiquio ecua siipojji chamajo poso equi jaahuana ajja jayojja jama a'a pojji! ¡Jesosaja epoe o'oyajji ishoa anicue! <sup>5</sup>Ojjaña miqianaya onijje jjapeequiani; quea ja'a nee nee ba'yani, epojjajo quea ja'a poquiani jayojja jama poani. E'e, eseya eshahua nijje poquiquehua ajja. ¡Joya ecua eshahua quea mimishi poani jama a'a pojji! <sup>6</sup>Pea cuanaa ca ca Jesosaja epoe o'oyajji ishoa ajja. Jamaya pojjeama eseya. Chojja. ¡Jesosaja epoe o'oyajji ejja'ishoa'ajjaqui! ¡Quea ja'a nee ejjashahuabaqui pea'ai!

<sup>7</sup>Shajjama' cuana quea jjashahuabaqui quehua poani Jesosaja epoe o'oyajji ishoa ajja. Quea jjashahuabaqui quehua poanijo shajjama' cuana quea mimishi ba'yani. E'e, jiquio ecua mecajje huoo majje shajjama' cuana jjashahuabaqui ajja jayojja jama onaya Jesosaja epoe o'oyajjijo jjashahuabaqui ajja. <sup>8</sup>Eseya ca ca, Jesosaja epeeji cuana quea ja'a nee ba'yani Eyacuiñajjija esohui jama. Quea ja'a nee jjashahuabaquiani. Jamajjeya Jesosaja epoe'oyajji ishoa'ajjaña. E'e, jiquio ecua sohuinanohua baa daqui quea moo ese'ojje huosho cani onaja quecua jjima yajji jayojja jama eseya Jesosa nijje jjapeequiani. ¡Pea cuana quea jea nee nee ejja'aqui pea'ai! Jamajjeya Eyacuiñajjiya eseya Edosiquiana nei jeabichajea meesahua caje. Jiquio ecua sohuinanohua ejaahuojja ca'a, baajee sapajo iya cani onaja sapa jaja jjima yajji jayojja eseya Jesosa nijje jjapeequiani; esejaya eba Eyacuiñajjiya eseya mimishi cuana cuijea'yo majje ba'e tiitii mee caje'yo onijje eyajo. <sup>9</sup>¿A'a Eyacuiñajjiya eseya babaca canaje cuaqui yasijje quea nee nee epo'oyajji? Chojja. Eseyaya Emeshi Mese nei nijje, Jesosa Quito nijje jjapeequianijo, mimishi cuana cuijea majje Eyacuiñajjiya eseya ba'e tiitii mee caje'yo onijje. <sup>10</sup>E'e, Jesosa Quito eseya mimishijo mano'ya poa. Jamajjeya eseya onijje ba'e tiitii mee caje'yo eyajo. E'e pojjaja' o poe o'oya jjimahuaajo eseya manojje'yo. E'e pojjaja' oya poeje o'oya ese eshe nequijo. Jamatii ojjaña eseya onijje ojee ba'e tiitiije'yo eyajo.

<sup>11</sup>Jamajjeya ¡jiquio esohuijo quea bihui nee nee pocue! ¡Jiquio esohui huohui huicha'a huicha'acue Jesosaja epeeji cuana quea bihui nee epojji! ¡Oya cuana Jesosa Quito nijje quea jaji nee jjapeequi meesahuacue pea'ai! Jamaya miqiaaya aña; ¡jamaya oe atiitiicue!



### Pabohua eba'ejji quea pamejo tehue canaje

<sup>12</sup>Epeeji cuana, jjeya eyaya pea esohui tehueaña miquianaja ebajji jama ba'a: ¡Jesosaja epeeji etii cuana miquiana nijje nequi shajja'ajjacue oe! Ohuaya miquianaya jaahuana cani, Eyacuiñajji esohui huohui cani pea'ai. <sup>13</sup>Oya cuana Eyacuiñajji quea pame nee chacochoanijo ¡quea boti nee acue! ¡Quea pame nee jjashahuabaquicue onajo pea'ai! ¡Ojjaña Jesosaja epeeji cuana nijje quea bei pocue!

<sup>14</sup>E'e epeeji cuana, jama acue pea'ai ba'a: Jesosaja epeeji quea huea poanijo, jjanobajjima nei onijje mimicue! ¡Epeeji quea mete cuana quea bei po meesahuacue! Epeeji eshahua nijje poquiquehua sa poanijo, ¡quea ja'a ba'e meesahuacue! ¡Tecue'ama po tiiticue ojjaña cuana nijje! <sup>15</sup>Onaa miya napa cajje ¡a'a jjasoseaquijji! ¡A'a onaya napa pea'ajji! ¡Ojjaña pojajo jjashahuaba neineiquicue ojjaña Jesosaja epeeji cuana nijje, pea cuana nijje pea'ai quea pame nee epojji! <sup>16</sup>Jesosaja epeeji poanijo ¡quea bihui nee po tiiticue! <sup>17</sup>¡Eyacuiñajji nijje mimi huicha'a huicha'acue ojjaña pojajo! <sup>18</sup>Miquianaya quea pame ba'yanijo, quea camaja miquianajo poanijo pea'ai ¡jamatii Eyacuiñajji bihuiacue oe! Jamaya Eyacuiñajji ejjashahuabaqui'yojji miquianajo, Jesosa Quito nijje japeequianijo.

<sup>19</sup>Edojjoshahua Pame minijje mimianijo, ¡a'a shajjama' pojji! <sup>20</sup>Eyacuiñajji esohui huohuijjiya esohui huohui canijo, ¡shajja'ajja neineicue oe! <sup>21</sup>¡Jamatii ojjaña esohui shajja'ajja neinei majje quea ja'a jjashahuabaquicue! ¡Esohui e'e nei jama acue! <sup>22</sup>¡Ojjaña mimishi cuana pajea neinei'yocue! E'e, ¡quea pame nee nee ba'e tiiticue!

<sup>23</sup>Jamajjeya eya Eyacuiñajji nijje miquiana huasijje mimiani jama ba'a: —Eyacuiñajji, miyaya ojjaña quea bei po tiitii meeña. ¡Miquea epeeji cuana minijje japee neineiqui meesahuacue quea boejea nee epo'yojji! ¡Oya cuana ba'e meesahuacue quea pame nee nee, mimishi'ama: ojaya ejjashahuabaquijji, ojaya eyami pea'ai, ojaya edojjoshahua pea'ai! Jamajjeya ecuanaja Emeshi Mese nei Jesosa Quito poe o'oyajo oya cuana bicho'ama, mimishi'ama poaje'yo —jamaya eya mimiani Eyacuiñajji nijje miquiana huasijje.

<sup>24</sup>Eyacuiñajjiya ojaya esohui miquiana nijje epajea'yojji pojjeama tii tii. Ohuaya miquianaya iyaa canaje onijje ejjapee tiitiiqui poquijji. Jamajjeya ohuaya miquianaya japeequi tiitii mee caje'yo quea pame nee nee.

<sup>25</sup>Ecuea epeeji cuana, ¡Eyacuiñajji nijje mimicue ecuanajo, ejo pea'ai!

<sup>26</sup>Ojjaña Jesosaja epeeji cuana nijje quea bihui nee mimicue jama ba'a: —Pabo miquianajo jjashahuaba tiitiiquiani; quea jea nee nee pa mi Pabojja.

<sup>27</sup>Eyaya Emeshi Mese nei Jesosaja esohui huohuijji poaniya miquianaya huohuaña jama ba'a: ¡Jiquio ecuea esohui etehue'yo ojjaña Jesosaja epeeji cuana huasijje huohuicue, ojjaña tii! Jamaya.

<sup>28</sup>¡Esejaya Emeshi Mese neiya Jesosa Quitohua miquianaya quea pame nee cajaanahua cahua!

Mahuiso. Eyaya Pabohua jiquio esohui tehue'yonaje. Apoa.